

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԴՐՈՇԻ  
ԸՆԴՀԱՆՈՒՐ ՏԵԽՆԻԿԱԿԱՆ ՊԱՅՄԱՆՆԵՐԸ

1. Հայաստանի Հանրապետության դրոշի հետ կապված ընդհանուր տեխնիկական պայմանները տարածվում են Հայաստանի Հանրապետության դրոշի (այսուհետ՝ դրոշ) վրա և սահմանում են դրոշին ներկայացվող տեխնիկական պահանջները:

2. Դրոշը պետք է համապատասխանի Հայաստանի Հանրապետության դրոշի հետ կապված ընդհանուր տեխնիկական պայմանների պահանջներին, ինչպես նաև Հայաստանի Հանրապետության օրենսդրությամբ սահմանված կարգով հաստատված համապատասխանության ազգային նշանի նմուշին:

3. Դրոշը՝ համաձայն ձևի, եռագույն է՝ վերևից ներքև ձգվող կարմիր, կապույտ, նարնջագույն հորիզոնական հավասար շերտերով: Դրոշի լայնության և երկարության չափերի հարաբերությունը պետք է լինի 1:2-ի:

Ձև. Հայաստանի Հանրապետության դրոշ



L - դրոշի երկարությունը, B - դրոշի լայնությունը,  $b_1$  - կարմիր շերտի լայնությունը,  $b_2$  - կապույտ շերտի լայնությունը,  $b_3$  - նարնջագույն շերտի լայնությունը:

4. Դրոշի երկարության և լայնության շեղումը չպետք է գերազանցի  $\pm 2\%$ -ը:

5. Դրոշը պատրաստում են տպագրման եղանակով կամ կարելու միջոցով: Դրոշը պատրաստում են 100 % պոլիէթերային գործվածքից, իսկ շենքերի ներսում տեղադրելու համար նախատեսված դրոշը՝ նաև բամբակե, վուշե խառը, մետաքսե կամ բրդե գործվածքից: Դրսում տեղադրելու համար նախատեսված դրոշի գործվածքի խտությունը պետք է լինի ոչ պակաս 90 գ/մ<sup>2</sup>-ից:

6. Դրոշի գործվածքի գունավորման կայունությունը, ըստ ԳՕՍՍ 9733.0 ստանդարտի, պետք է լինի ոչ պակաս 5 բալլից՝ լույսի և եղանակի ներգործության նկատմամբ, 4 բալլից՝ ջրի կաթիլների ներգործության նկատմամբ և 3 բալլից՝ չոր և թաց շփման նկատմամբ:

7. Դրոշի գործվածքի երեսակողմի և հակառակ կողմի գունային դաջվածի ինտենսիվության տարբերությունը չպետք է գերազանցի 15 %-ը:

8. Դրոշի պաստառի գործվածքի շերտերը պետք է ձևել դրոշի երկարությամբ երկայնական թելի պահպանմամբ, իսկ եզրերը պետք է եզրակարել ծալքակարով: Դրոշը պատրաստում են ամբողջական գործվածքից կամ կարելու միջոցով:

9. Դրոշի պաստառի եզրերը պետք է մշակել երեսակողմից չերևացող զարդակարով, որից հետո 0,3- 1,0 սմ լայնությամբ փակ կարվածքով (հարթակարով)՝ ըստ ԳՕՍՍ 12807 ստանդարտի:

10. Կարը պետք է լինի ամուր, ուղիղ, կարի ծայրերը պետք է ամրացված լինեն հետադարձ կարով՝ 0,7 սմ ոչ պակաս երկարությամբ: Կարի հանախությունը պետք է լինի 15-20 կուրթ (կար)՝ յուրաքանչյուր 5 սմ-ի վրա:

11. Թելերը պետք է համապատասխանեն ԳՕՍՍ 6309 պահանջներին: Դրոշը պետք է կարել շերտի գույնի կամ թափանցիկ կարի թելերով: Երեք շերտից կարվող դրոշը պետք է կցակարել տարբեր թելերով՝ վերևի և ներքևի շերտերի գույներին համապատասխան:

12. Դրոշը պատրաստում են ամրացման երկու եղանակով՝

1) ձողին կցելով՝ գրպանի միջոցով, գրպանի լայնությունը պետք է լինի դրոշի երկարության 5 %-ից ոչ ավելի և չգերազանցի 10 սմ-ը.

2) եզրակի օգնությամբ, եզրակի լայնությունը՝ 3,0- 3,5 սմ:

13. Դրոշի գույները պետք է համապատասխանեն տարբեր գունային մոդելների արժեքներին, որոնք տրված են աղյուսակում:

#### Աղյուսակ

Գույնը	Pantone	RGB	CMYK	html
կարմիր	485	R: 217; G: 0; B: 18	C: 0% M: 100% Y: 100% K: 0%	#D90012
կապույտ	286	R: 0; G: 51; B: 160	C: 100% M: 80% Y: 0% K: 0%	#0033A0
նարնջագույն	1235	R: 242; G: 168; B: 0	C: 0% M: 35% Y: 100% K: 0%	#F2A800

14. Pantone և CMYK տարբերակները կիրառվում են տպագրությունում, RGB տարբերակը կիրառվում է կայքերում և հեռուստատեղերում, html տարբերակը կիրառվում է կայքերում:

15. Դրոշներն արտադրում են առանց տեսակավորման: Պատրաստի արտադրանքում պետք է պահպանվեն հետևյալ պահանջները՝

1) գործվածքի կառուցվածքի ամբողջականություն.

2) բծերի առկայությունը չի կարող գերազանցել 0,3 սմ-ը.

3) մանածագործական թերությունները չեն կարող լինել տեսանելի գերուր թելերի տեսքով, 10 սմ-ից ավելի շեղաթելերով, 0,3 սմ-ից ավելի խտվածքներով, հենքի և թեզանի վրայի նկատելի արտահայտված շերտերի տարբերությամբ.

4) գունային շերտում երանգային տարբերությունը պետք է լինի լավ տեսանելի:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ  
ՂԵԿԱՎԱՐ-ՆԱԽԱՐԱՐ

Դ. ՀԱՐՈՒԹՅՈՒՆՅԱՆ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԶԻՆԱՆՇԱՆԻ  
ԸՆԴՀԱՆՈՒՐ ՏԵԽՆԻԿԱԿԱՆ ՊԱՅՄԱՆՆԵՐԸ

1. Հայաստանի Հանրապետության զինանշանի հետ կապված ընդհանուր տեխնիկական պայմանները տարածվում են Հայաստանի Հանրապետության զինանշանի (այսուհետ՝ զինանշան) վրա և սահմանում են զինանշանի ձևին, չափերին և պատրաստմանը ներկայացվող տեխնիկական պահանջները:

2. Զինանշանը պետք է համապատասխանի Հայաստանի Հանրապետության զինանշանի հետ կապված ընդհանուր տեխնիկական պայմանների պահանջներին, ինչպես նաև Հայաստանի Հանրապետության օրենսդրությամբ սահմանված կարգով հաստատված համապատասխանության ազգային նշանի նմուշին:

3. Զինանշանի պատկերը (գունավոր և միագույն) սահմանված է Հայաստանի Հանրապետության զինանշանի հետ կապված ընդհանուր տեխնիկական պայմաններում (ձևեր NN 1, 2):

4. Զինանշանը կարող է պատրաստվել տարածական և գրաֆիկական տեսքով: Գրաֆիկական պատկերը կարող է լինել միագույն և գունավոր: Գունավոր գրաֆիկական պատկերը պարունակում է ոսկեգույն, նարնջագույն, կարմիր և կապույտ գույները:

5. Տարածական կատարմամբ զինանշանը, անկախ իր չափերից և ստացման տեխնոլոգիական եղանակից, պետք է համապատասխանի Հայաստանի Հանրապետության օրենսդրությամբ սահմանված կարգով հաստատված համապատասխանության ազգային նշանի նմուշին և տեխնիկական փաստաթղթերին՝ ըստ ձևի, չափերի ու համամասնության:

6. Զինանշանի գրաֆիկական պատկերը կարող է ստացվել ցանկացած տեխնոլոգիական եղանակով (տպագրություն, դրոշմում, փորագրություն, համակարգչային գրաֆիկա և այլն) և անկախ չափսերից պետք է պահպանի զինանշանի հստակ և պարզ պատկերը՝ իր

գործածման ժամանակահատվածում: Զինանշանի միագույն պատկերը՝ սև կամ այլ գույնով, կամ անգույն (օրինակ՝ տարբեր եղանակներով դրոշմված) ուրվագծային պատկերն է: Ուրվագծերի միջև ընկած հատվածները չպետք է գունավորված լինեն և պետք է պահպանեն թղթի կամ այն կրիչի գույնը, որի վրա պատկերված է զինանշանը: Զինանշանի տարածական պատկերը, ինչպես նաև զինանշանի պատկերը, մետաղի վրա համարվում է միագույն, եթե համապատասխանում է այն նյութի գույնին, որից այն պատրաստված է:

7. Զինանշանի գույները պետք է համապատասխանեն տարբեր գունային մոդելների արժեքներին, որոնք տրված են աղյուսակում:

#### Աղյուսակ

Գույնը	Pantone	RGB	CMYK	html
ոսկեգույն	124	R: 255 G: 196 B: 75	C: 0% M: 25% Y: 80% K: 0%	#FEC34E
կարմիր	485	R: 217; G: 0; B: 18	C: 0% M: 100% Y: 100% K: 0%	#D90012
կապույտ	286	R: 0; G: 51; B: 160	C: 100% M: 80% Y: 0% K: 0%	#0033A0
նարնջագույն	1235	R: 242; G: 168; B: 0	C: 0% M: 35% Y: 100% K: 0%	#F2A800


8. Pantone և CMYK տարբերակները կիրառվում են տպագրությունում, RGB տարբերակը կիրառվում է կայքերում և հեռուստատեղերում, html տարբերակը կիրառվում է կայքերում:

9. Պաշտոնատար անձանց և պետական կազմակերպությունների ղեկավարների գրասենյակներում, պաշտոնական հանդիպումների սենյակներում և դահլիճներում Հայաստանի Հանրապետության օրենսդրությամբ նախատեսված դեպքերում զինանշանը տեղադրվում է նախագահության հետևի պատին՝ նախագահողի թիկունքի ուղղությամբ:

10. Մուտքի մոտ տեղադրված ցուցանակի վրա պետական կազմակերպության անվանման հետ միասին ցուցանակի վերին կենտրոնական մասում զետեղվում է զինանշանը:

11. Զինանշանի օգտագործումը պետական մարմինների, պետական կազմակերպությունների և դրանց ղեկավարների ձևաթղթերի, կնիքների վրա իրականացվում է զինանշանի հետ կապված ընդհանուր տեխնիկական պայմանների համապատասխան:

Ձև N 1. Հայաստանի Հանրապետության զինանշան (գունավոր տարբերակ)



Ձև N 2. Հայաստանի Հանրապետության զինանշան (միագույն տարբերակ)



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ  
ՂԵԿԱՎԱՐ-ՆԱԽԱՐԱՐ

Դ. ՀԱՐՈՒԹՅՈՒՆՅԱՆ